

التتر

مصور خصيصاً من لقطات معدة مسبقاً وليس من مشاهد الحلقات

التتر يقدم عبر أغنية شجنية بألات حية يمتزج فيها الإيقاع الشرقي بألات شعبية مصرية مثل الربابة والدف والناي بموسيقى العصر الغربية مثل التشيللو والبيانو ويختلط إيقاع الجاز باغاني ايديت بيباف

يهدف التتر لتقديم العالم الذي تدور فيه أحداث المسلسل

عالم ليلي الشابة الجميلة الخيالية التي تطمح بحياة رغبة غنية تفوق حياتها الجافة القاسية

حياة حسن الشاب المثالي الصعيدي الطيب الذكي الفقير المغلوب على أمره

الذي يرى الحياة خطوط مستقيمة واضحة

حياة الأب مرزوق المتدين الهادئ المتواكل الذي انتهت حياته بموت قمر زوجته

حياة رمزي الشاب الطامح في مشروع هندسي ضخم ينظم الري والزراعة بمصر وينهض بها ويرفعها من مصاف الدول المحتلة الفقيرة لدولة تعود لها مكانتها وحياته الخاصة بارتباط بفتاة جميلة تحتويه

سارة

الفتاة نصف المصرية تصف اليهودية الطامحة للخروج من دائرة الفقر باي ثمن

حياة العزاوي بيك المتحكم في خيوط الحياة والموت وكأنه الشيطان في زي الطيبين

والأسرة المسيحية الهادئة المصرية وحنانها على ليلي

والساحر والقرصان والرؤيتين المتناقضتين ما بين القرصان وكأنه ممثل الحيلة والشر

والساحر ممثل النظرة الصوفية والخير

وناس أخرى يعيشون بينهم

نهاية التتر

م1

فوتو مونتاج

ليلى تفيق من نومها في بيتها الفقير على معزة صغيرة تقترب منها وتمسح بها
ليلى فوق سطح منزلها تنتشر بعض الملابس الملونة والبيضاء الزاهية
ليلى في الحقل تجمع بعض الزهور والنباتات والخضروات الملونة
ولسان حالها يحكي ما يحتويه صدرها من أمل في حبيب غني ينقلها لحياة ناعمة ثرية
قطع

ن-د-خ

2م

صالة وشرفة شقة تطل على بحر اسكندرية

أغنية ايديت بياف

La vie en rose - Edith Piaf

صادرة من جراموفون شنطة هيز ماستر فويس

الجراموفون موضوع في صالة شقة داني بينما سارة ترقص بخفة ونعومة منفردة مع

الموسيقى وتغني بصوت عالٍ يغطي على صوت بياف

سارة في حالة نشوة

تلتقط تفاحة من طبق به فاكهة موز وعنب وتفاح أحمر

تقضم منها بوحشية طفولية تتفق مع سنها الذي تجاوز العشرين بسنة وبملابسها جيب أزرق فضفاض وقميص ابيض شبيه بالقمصان الرجالي مفتوح زرارين من أعلى يبرز جمالها لكن

بلا اسراف

سارة مستمرة في الرقص

يقترب داني قادماً من داخل الشقة

حاملا في يده بالتة وريشات رسم وحامل مثبت عليه توال قماش به رسم لم يكتمل لسارة

يضع داني ذو الأربعين عاماً الحامل

ويمد يده يرفع الأبرة عن الأسطوانة

تلتفت نحوه سارة متعجبة ومندهسة

ينقر بالريشة على الباليتة

داني بحزم : سارة مكانك

يشير بالريشة للشرفة حيث نجد كرسي خشبي بظهر وخلفيته البحر

تتجه سارة نحو الكرسي

سارة بطاعة : أوكي

يلتفت لها داني من خلف اللوحة : من فضلك افتحي كمان زرار وحطي رجل عل رجل
وارفعي الجوب شوية
تعتدل سارة بمكر: نو .. ما اتفقتاش على كده.. انت قلتلي الرسمة بجنيه على عشر جلسات
الجلسة عشر قروش...

يقترب منها داني بهدوء: انتي فاكرة ايه يا سو أور ديل ايز تو دو هوان أي أسك

سارة: نونو مش كله مسيو داني

داني يكظم غيظه : اوكي طيب نص ونص

يمد يده يعدل لها ياقة القميص ويرفع قليلا الجوب

تنظر لصدرها ولقدميها

سارة مبتسمة: استبيننا

داني: استبيننا .. تعرفي لو خلصنا الرسمة النهاردة... ليكي عزومة اكسترا اودرنير

سارة تقضم آخر قطعة من التفاحة مبتسمة

قطع

ن-خ

الميناء

3م

يقف مصطفى الشوبكشى " فى خمسيناته ، وسيم ، مهندم ، ذو شارب يعتنى به ، يرتدى ملابس وعمامة صعيدى " وجواره مخلوف " فى خمسيناته هو الآخر ، وجهه عابث ، يرتدى ملابس صعيدى هو الآخر عادية " ويقف أمامهم مسئول الميناء الذى يكتب فى ورقة بعض الأشياء وهو يكلمهم

المسئول :

لاء المركب هاتأخر شوية يمكن تدخل النهاردة بالليل

مخلوف :

يادى العطلة ، وبعدين ها نعمل إيه؟؟

الشبوكشى يبين عليه إمارات السعادة ، ولكنه يكتم سعادته ، ومسئول الميناء ينصرف

الشبوكشى :

ها نعمل إيه يعنى أدينا هانستنى إن شاء الله نبات للصبح ده مال ناس يا مخلوف

مخلوف :

لاع نبات لاع .. عنايات هانم جالت مافيش بيات واصل

الشبوكشى :

عنايات دى تبجى مرتى أنا .. وأنا اللى أشوف المصلحة فين.. المركب ها تتأخر نهملها ونروح علشان جالت؟؟ولا نفكر ونجعد ونستنى تجارتنا ياأبو مخ تخين

مخلوف :

مرتك ولا أنت اللى جوزها .. أنا ماليش صالح.. ها أكلها أشاورها وأعاود

يتحدث مخلوف وهو ينصرف من المكان وهو بيرطم ، بينما الشبوكشى يشيح بوجهه بعيدا عنه

الشبوكشى :

غور.. ياكش ياكلك وابور أنت وعنايات وجتى .. دى تجادير ربنا نعاندها ولا نجوله الحمد لك على اللى بتلطف بعبدك بيه.. ليلة فى الإسكندرية بعيدة عن وشها والبلد كلها يا ساتر ..

مركب فى المياه تقترب من الرصيف

قطع

ن - خ

صخرة على الشاطيء

سارة جالسة على صخرة على الشاطيء ويقف بجوارها رمزي المهندس الشاب

المليء بالحيوية والانفعال بينما سارة تاكل من قرطاس بيدها فول سوداني

سارة تلتفت له باصغاء واهتمام

رمزي بجدية شديدة : عرفة يا روجي .. أنا محتاجك جنبي .. تساعديني وتشجعيني

أحلامي كبيرة للبلد دي .. نفسي أعمل مشاريع ضخمة عشان النيل واعمل رحلة لفوق لكينيا
وأوغندا

عارفة لو نظمنا النيل هينوفر لمصر قد ايه

سارة بتهكم : كام جنينه يعني

رمزي: مش فلوس هنوفر أرض نزرعها ومصانع وبلدنا تبقى فوق زيها زي كل الدول
العظمى

سارة: رمزي حبيبي .. ومافكرتش نوفر كام عشان نتجوز .. نجيب عربية؟

نجيب بي بي؟

تجيبي فستان؟

رمزي يهدأ من حدته مرتبكاً: طبعاً طبعاً انت الحورية وعروسة البحر تستاهلي اللولي
والباكار وكل الاحلام الجميلة

سارة تقاطعه: مش أحلام .. عارف انا من الصبح بادور على شغل وماما شقتنا اللي قلبناها
بنسيون مأجرين اوه وبنام في الثانية والفلوس اللي جاية بتتصرف عشان الزبون يبجي تاني

انا تعبت يارمزي من الأحلام

شوف لك حل

رمزي: حاضر

سارة: وبسرعة .. أنا تعبت

رمزي يهز رأسه منصاعاً

موجة قوية من البحر ترتطم بالصخور

تحتمي ساة من الموج في حزن رمزي
الذي يحتويها بحب وثقة

قطع

قرية الوصلة قناية مياه أصغر من الترعة

قناية مياة صغيرة تصل ما بين الترعة الكبيرة وما بين الأرض الزراعية

مجموعة من الشباب بالسراويل الداخلية وصدورهم عارية , الجلابيب معلقة على شجرة أسفلها معزة صغيرة سوداء مربوطة أيضا بالشجرة وجوارها مشنة من الخوص بها سمكتان صغيرتان يعتنى بهما عباس باهتمام شديد ويرش عليهما الماء

الشباب هم مسعد " فى نفس سن حسن ، نحيف الجسم ،خفيف الدم، قصير القامة " وعباس " فى نفس السن تقريبا ، طويل فارع الطول، له حاجبان كثيفان "

يظهر من بينهم حسن " فى بداية العشرينات جسمه قوى ، له شارب خفيف " خالع جلبابه مثلهم ومعلقه على فرع شجرة ، الشباب صنعوا منطقة معزولة فى الترعة يقومون بتجفيفها

مسعد يمسك بجرذل حديدي صغير ينزح الماء من المنطقة المعزولة بجدية بينما حسن يطارد بيديه مجموعة من القراميط السوداء التي تتحرك بقوة داخل الطين والماء القليل

حسن يخرج من الترعة ذكر قرموط كبير وهو يتلوى بين يديه يبدو عليه الفرحة الغامرة وهو يخرج من الماء ويباهى بها أصدقائه ،

حسن :

شوفوا الحوت اللي إصطدته ياولاد جرجا ، حوت ..حوت مش ضفادع ، وأنتم م الصبح على ابو ذنيبة وصراصير النيل

يضرب حسن المشنة بقدمه فتسقط السمكتان الصغيرتان الموجودتان فى المشنة ويضع سمكته الكبيرة مكانها مما يثير عباس فيقترب برأسه من رأس حسن يناطحه

عباس :

إيه بترمى شقانا من الصبح وصبرنا ليه؟؟

حسن :

مين ها يأكلوا ده؟؟ ارموهم فى المية خللى القراميط يجى لما يلاقنه فى الميه طعم ونصطاده ساعتها بأيدينا

مسعد :

أنا أكله .. مالوه ماكان من شوية هو رزقنا قبل ما تصطاد حوتك .. راحت فين السمكات ياعباس اللي إصطادناها؟؟

يضحك عباس وحسن ، على منظر مسعد الذي يبحث عن السمكات الصغيرة ، ومسعد يبحث بيده فيمسك
بقرموط كبير كالذي أمسكه حسن وسط ذهول الجميع بما فيهم مسعد الموجود في الماء الذي لا يصدق ما
يمسكه فينظر لها بعدم تصديق

يلقى مسعد القرموط في المشنة ويصيح فيهما

مسعد : الخير كثير القراميط مالية الجورة ياولاد

يلقي عباس بنفسه في الماء وخلفه حسن

ويطار دون القراميط يرفع حسن ومسعد كل منهم قرموط كبير بينما عباس يضرب بيديه عبثا

عباس: بتجيبوا السمك ده منين بس؟

مسعد وحسن يضحكان وهما يلقيان القراميط في المشنة

قطع

حوش دوار الشبوكشي

المشهدان التاليان بالتوازي بين مخلوف و عنايات

عنايات هانم سيدة خمسينية متصابية تدخن شيشة وتمسك بالتليفون

عنايات: مخلوف .. واد يا ماخولف - تسحب عنايات في حروف المد وهي تتكلم..

تقوم دلوقتي قامت قيامتك انت واللي خلفوك على محطة مصر في اسكندرية وتأمين تذكرة للشبوكش ان شاء الله آخر الليل ما يببيتش ياواد والا فهمه هو عارف عنايات هتعمل فيه ايه

تعلق عنايات التليفون

تسحب نفساً من الشيشة وتكح

قطع

مخلوف يمسك السماعة وهو يتحدث بصوت عالي وهو يتلفت حوله لعل أحد يراه

مخلوف :

أيوه يا عنايات هانم .. لع ها تتأخر يمكن لليل .. نعمل إيه ؟؟ .. ماخبرش .. يمكن يكون في جطارات ويمكن مافيش .. عسأل في محطة الجطورات .. خابر زين .. مش هأسييه وحديه واصل .. لع الفلوس كلها معاى .. خابر .. خابر .. ده أنا مخلوف ،لع واعى زين

يغلق السماعه ويهدم نفسه ويخرج من الكابينة
قطع

ن - خ

م 8

الساحة أمام بيت حسن

ليلي أمام طشت نحاس به ثلاث سمكات قراميط تتحرك سا بحة في الماء تلاعبهم ليلي وهي تضحك

بينما حسن على مقربة منها يطعم الكانون قطعا من قوالح الذرة والأخشاب

وبجواره طاسة زيت

حسن : الهمة يا ليلي أنا واقع م الجوع

ليلى : من عنيا يا خويا يابو علي يا أعز الناس طب خش جوه الدار هات حفتين دقيق وراسين توم
فجأة تطل من فوق رأسهم السيدة القبطية نينيت ضاحكة

نينيت: العواف عليكو

ليلى : اقعدى والنبي لا تاخدي واحدة لمارية معاكي

نينيت: قوم يا حسن هات سكينه عشان ندبح

حسن مندهشاً: ندبح ايه ؟ ياكش ده فروج دي قراميط

تبتسم نينيت: أمك قمر الله يرحمها اللي علمتهاني القراميط دوننا عن السمك كله لازم يندبح وينزل دمه

حرام يتاكل فطيس كده

يقوم حسن مسرعاً للداخل

ليلى لنينيت: ومارية ماجاتش معاكي ليه

نينيت : بعافية شوية

تفز ليلى من مكانها: أقوم اتطمئن عليها

يخرج حسن ممسكاً السكين ويجد ليلى تبحث عن الطرحة وتضعها على رأسها

حسن : على فين؟

ليلى : خمسة وراجعة

حسن ممسكاً بالسكين : انا جعانا

قطع

ن-خ

رصيف الميناء

9م

يشعل الشوكشى سيجارة من سيجارة أحد العاملين يأتى مخلوف خلفه

مخلوف :

عنايات هانم جالتلى نرجع فى جطر الليل

يشكر الشوكشى العامل ويلتفت لمخلوف

الشوكشى :

وإيش عرفك أنت إن فى جطر بالليل كنت سألت فى محطة الجطورات وانت جاى؟؟ ، وبعدين مش جايز
المركب تعوج عن ميعاد الجطر يا غبى ..نعمل إيه وجتيها؟؟

مخلوف :

عنايات هانم جالت لو عوجت المركب تدلى أنت فى الجطر وأستنى أنا فى المينا لغاية لما تيجى البضاعة
أشحنها فى اللورى وأتشن معاها

الشوكشى :

وهى تجول ولا تعيد ليه؟ مين الراجل فينا أنا ولا عنايات يأبوعجل تخين؟، مين الرئيس اللى بي فهم فى
الشغل ويمشه أنا ولا عنايات؟

مخلوف :

أنا ماليش صالح

الشوكشى :

خلاص .. خليك أنت مستنظر هنا وأنا هأروح المحطة أشوف حكاية الجطورات دى

مخلوف :

رجلى على رجلك يا معلم شوكشى

الشوكشى :

أنت تفضل هنا ، علشان المركب لما تعاود ، وأنا هأرجع على طول ماهو لازم حد يخليه منتظر المركب يا
مخلوف

مخلوف :

مالهانم جالتلى مافونكش واصل

الشوبكشى :

الهانم دى تبجى مرتى يأبو مخ تخين

مخلوف :

مرتك ولا أنت اللي جوزها .. أنا ماليش صالح..

ينفخ الشوبكشى بنفاذ صبر وهو يفكر فى حيلة للتخلص من مخلوف ، يقربه وهو يوشوشه

الشوبكشى :

وأنا بأجولك يأبو عجل تخين لو خرجت من المينا دلوجتى الكل عارف أنك فى جيبك الفلوس وإن عنايات ما بتتجش إلا فيك ، حد يحطرننا فتنشل المحفظة اللي معاك، ساعتها ها تجول إيه لعنايات هانم كنت ماشى ورا المحروس جوزك؟! والله تلجك على باب الزريبة..أرسى فى مكانك وأنا هأجبلك على طول ، عقبال ما تطلب لنا أكلت سمك على حسابى من عند حميدو اللي على راس المينا أكون أنا أدليت وجيت

ينظر مخلوف للشوبكشى وهو يتأكد من صدق حديثه والشوبكشى يهز رأسه وكأنه يؤكد صدق نواياه

مخلوف :

بس عنايات هانم ماتأخدش خبر

الشوبكشى :

إحنا رجاله يا مخلوف زى بعضينا .. وكلامنا مش هزار عنايات مالهاش صالح ، وده سر بانانتنا

ينصرف الشوبكشى خارجا من المكان وهو يبرطم

الشوبكشى :

يجطع عنايات على مخلوف على تعكير الدم

قطع

م10

ن-خ

بنسيون وشقة سارة وأمها

فيوليت والدة سارة سيدة يونانية تتحدث العربية بطلاقة في صالة شقتها المكونة من أربع غرف

وقد حولتها لبنسيون وسكنت هي وسارة في غرفة.

فيوليت أمام الباب يبدو عليها بقايا جمال سابق وان كانت مازالت معتنية بنفسها

فيوليت أمام الباب تحاسب رجلا صعيدي ويناولها جنيهاً وعدة قروش

فيوليت: نشوف وشك على خير قريب يا معلم

الرجل: عن جريب ان شاء الله بس ادعيلنا تتم البيعة وانا آجي وأجيب العيلة وعيلة العيلة

يحمل الرجل حقييته ويتجه نحو الباب تساعده فيوليت وتفتح الباب

ويخرج بينما تندفع سارة داخلة وهي مبللة الشعر والملابس

سارة : سعيدة يا فيوليت

فيوليت: سعيدة يا سو بتشتس برة؟

سارة : كنت غطسانة في البحر

فيوليت تضع النقود بجوارها على أحد الكراسي

بينما يرن التليفون فنقوم نحوه

تنظر سارة للنقود وتقرب منها وتأخذ قطعة معدنية وتتجه لحجرتها

فيوليت: آلو ... أيوه بنسيون مدام فيوليت .. تحت أمرك

تلقت نحو سارة وهي تدخل حجرتها وتغلق الباب خلفها و تلحظ أنها أخذت نقوداً

فيوليت هامسة: اخص واطية زي اللي جابك

قطع

عصر-خ

11م

أمام الميناء

الشبوكتشى يقف فى الخارج وأمامه موظف الميناء ، والشبوكتشى يعطيه جنيه فى يده وهو يتألف ، الموظف يأخذ المبلغ وهو يشكره ويدخل المينا مرة أخرى ،الشبوكتشى يوقف حنطور ويركبه

العربجى :

على فين يابلا دينا

الشبوكتشى :

مريوط خُصْ نعيمة

يهز العربجي رأسه موافقاً : مسا التماسي ياعمدتنا

يسير العربجي بالحنطور باتجاه البحر

قطع

مطعم وبار آتينيوس

فرقة موسيقية جاز تضع أدواتها وتستعد للعزف

الفرقة ترتدي زيا موحدًا بدلة سوداء وقميص أبيض

المطعم والبار مزدحم في بداية السهرة

في أحد الأركان مجموعة من الرجال ثلاث رجال بالزي الأفرنجي بينهم خواجه ورجل بزي صعيدي

الرجل الصعيدي: نلحق نشرب حاجة على ما الأمير بييجي

الخواجه يلتفت له

الصعيدي: العزاوي باشا هو الأمير الحقيقي للصعيد

بيؤمر ويتأمر من محطة مصر لغاية أم درمان

يسمع دبيب النمل

وعراف القرد مخبي عياله فين

الجميع منصتون له باهتمام شديد

الخواجه : كنت فاكر ان جلالة الملك فاروق ملك مصر والسودان

الصعيدي: الا في موضوع السلاح العزاوي يعرف مينحيازته ايه أو جريمته ايه ومعاه كام راجل حماية

وعنده كام حنة سلاح ومحتاج كام

أحد الجلوس : للدرجة دي؟

الصعيدي يقترب برأسه منهم : وأكثر ده راجل بر وخير

لو قصدته في حنة سلاح وانت ممعاكش يدملك السلاح ويقولك نتحاسب ببعدين

الخواجه: ده راجل خطير جدا

الصعيدي : راجل طيب وحنين

أحد الرجال: يبقى على كده مش هيرضى يورد لنا لو عرف اننا بنشتغل في تهريب البضائع

الصعيدي: ماهي دي بقى سبب حنيتة .. انك تكتشف انه هو اللي بيورد للمطاريد وفي نفس الوقت للحكومة

للمهربين وللعمد والحكمدارية راجل حنين والعدل عنده أساسي

ينظرون لبعضهم بتهعجب

يصفق الصعيدي بيديه

يقترب الجرسون متأففاً وهو يضع أطباقاً من المأكولات الفاخرة

قطع

م13

ل-د

صالة بيت مرزوق

مرزوق وليلى وحسن وقد انتهوا من الطعام وأمامهم الطبلية وصينية القراميط
وقد قاربت على الانتهاء وبقايا عيش مرحرح طري
ينقي منه حسن السليم ويجمع بقايا السمك من الصينية ويعمل ساندويتشاً

مرزوق يقبل يديه يلتفت نحو ليلى
مرزوق : الفاتحة للي جابتك المرحومة الست قمر
نفسها في الأكل ولا كأنها هي اللي مخرجاه من الفرن
يبدأون في قراءة الفاتحة

بينما حسن ممسك بيده اليسرى الساندوتش ويرفع يده اليمنى فقط ليقراً
تلمحه ليلى مبتسمة

مرزوق: مالك بتلم الفرايت يا حسن لساك جعان؟
حسن مرتبكاً : لا يابا أصلي باقوم جعان بالليل وبادعيس على حاجة تسد الجوع

مرزوق: ربنا يطعمك ما يحرمك انت واختك
يقوم حسن من مكانه باتجاه باب الدار

حسن: بعد اذنك يابا هاتمشى شوية الأكلة كانت كتيرة وجامدة

مرزوق حرص على نفسك يا حسن
حسن حاضر

ملحوظة هناك لغة عيون وتواطؤ بين ليلى وحسن في المشهد السابق

قطع

ل- خ

14م

طريق الزراعة

حسن يسير بين الزراعات وهو يحتضن السندويتش في يده

يلمح من بعيد خيالات لفتاتين

يكمن حسن في مكانه منشرحا

قطع

منزل مرزوق

الصالة وقد تم تنضيفها تمام والأب يرشف من كوب شاي ثقيل

وليلي بجواره ساكنة

مرزوق: يا ليلي أنا مش هاعيش لك العمر كله

ولا حسن أخوكي أديكي شايفاه يوم شغل وعشرة عطلة والدنيا عم بتخبط فيه يمين وشمال

ليلي : شباب لساه وعايش زي اصحابه

مرزوق: سكرّة الشباب اللي هو فيها والتوهة والضحك بصوت عالي والنوم ع الجسر

وعدم حساب اليوم اللي جاي

خطر

هاييجي يوم مش هايلاقيني وراه ساعتها مش هينفع الندم لا انتي ولا هو

تحتضن ليلي مرزوق: ربنا يخليك لينا ويطول في عمرك

مرزوق: يابتي انت طالعة لأمك والعين عليك في الروحة والجاية

والكلام ابتدى عليك

يتنهد

تلات شبان من أهل البلد كلموني

ولازم أشورك على حياة عيني

ماتروحيش بيت عدلك بالرخص

ليلي بهدوء وبذكاء: طب مش نصبر شوية عشان ما روحش بالرخص يابو حسن

لو بتعزني ورايدلي الخير

أصبر شوية

مش يمكن ربنا كاتبلي حاجة أحسن

مرزوق: يووووه .. هو انت عرفتي مين المتقدملك؟

ليلي: عد غنماتك يا جحا

عامل باليومية في الزراعة ولا عواظلي ولا بيّاع سريّح؟
ينظر لها مرزوق بحب وغضب وحذر

مرزوق: ياكش تكوني مستتية باشمهندس ولا دكتور

ليلى: قول يارب

قطع

حجرة سارة

سارة أمام المرأة تتهند وهي تدور حول نفسها معجبة بملابسها

تدخل أمها وتتفحصها

فيوليت: جميلة يا سو

سارة : بجد جميلة يا ماما

فيوليت: ايوه بس ياريت جمالك ده يبقى سبب خير ما يجبلناش التعب

سارة: ليه يا مام؟

بدل ما تقويني وتشجعيني؟

فيوليت: كل أم تتمنى لبنتها الخير كل الخير

تلحظ فيوليت فتقا في فستان سارة

فيوليت استني عندك

تتناول فيوليت علبة الخياطة من جوارها وتخرج ابرة وفتلة

وتقرب سارة منها

وتبدأ في اصلاح الفتق

سارة : من ساعة ما ضيفتيهولي من سنتين وانا ما عنديش غيره

فيوليت : ولا أنا وحياتك

تلقت لها ضاحكة وتحتذنها

قطع

ل- د

م16

طريق الكورنيش

رمزي في الطريق يسير على غير هدى

سيارة تصدر كلاكس

يلتفت يرى على الناحية الاخرى سارة متأبطة ذراع شاب لا يعرفه- داني

ويدخلا باب أتينيوس

رمزي يقف مكانه غاضباً

قطع

حقل

حسن وفريدة جالسان فى الحقل المجاور للإستراحة وهما قريبان من بعضهما بينما هنية
تراقب الطريق من بعيد

حسن بوله وحب:

أنا جاييلك حاجة بسيطة كده مش قد المقام

والنبي ما اتى كاسفة ايدي

فريدة بنعومة وترقب:

جبت لى ايه يا حسن

حسن يخرج من عب الجلباب الساندويتش

ويقربه من فم فريدة

حسن : لقمة ناكلها سوا

فريدة مندهسة ومرتبكة تحاول تصنع الفرحة

فريدة : تسلم ايديك

وده ايه يعنى؟

حسن بفخر : بواجى صينية لامؤاخذة القراميط

صايدها بايديا دول ولما البت لىلى طبختها

ماهانش عليا ماتدوجيش منها

بيدو أن فريدة لا تحب السمك ولكنها مازالت تمثل الفرحة

وتزيع بوجهها عن يد حسن الممدودة بالساندويتش

فريدة: على كدة بكرة تستتاني فى نفس المكان واجييلك معايا طاجين يامية باللحمة
الضاني

حسن: ياريت وتبقى ليلة فل الغل

يقترّب حسن بوجهه من فريدة ويتلفت حوله ويلحظ هنية تراقب شيئاً على الطريق ولا
تراهما

حسن: مش ناوية تديني جطة؟

تقوم فريدة واقفة بانزعاج وتسير مبتعدة

فريدة : عيب عليك انا زي اختك

حسن واقف في مكانه

حسن : استتي يا بنت الناس

طب خدي اللجمة

ينظر للساندويتس ولها هي وهنية وهما يتعدان

ويجلس ثانية في مكانه

قطع

ل - داخلي

اتينوس

القاعة مكتظة بالعديد من المرتادين
على المقاعد أو راقصين
الفرقة الموسيقية تعزف بحرارة والجمهور متجاوب جدا
يدخل رمزي في المكان ويبحث في وسط الجالسين
يرتطم رمزي في طريقه بأحد الجرسونات ولا يأبه به
ويرتطم به أحد السكارى
رمزي يبحث بجنون عن سارة ولا يجدها
يقترب من مائدة الصعيدة والخواجة والرجال المنتظرين العزاوي
فجأة يتغير ايقاع الموسيقى الراقصة ليصبح أكثر حيوية ونشاط
يقيم الراقصون دائرة نرى سارة في الوسط ترقص بجنون والجميع يصفقون لها على الايقاع وهي تزداد
سخونة في حركاتها الراقصة
يلمحها رمزي فيحاول الاقتراب واختراق الدائرة ولكنه لا يفلح
فيقف مراقبا مغتاظا
حتى تنتهي سارة من رقصتها
وتشتعل الصالة بالتصفيق
تسير سترة منتشية وكل العيون تراقبها وهي مستندة على داني
بينما يحاول رمزي الوصول لها
تجلس على منضدة يوصلها لها داني
داني : دقيقة وراجع لك
تهز سارة رأسها
بينما رمزي يتقدم ويجلس بجوارها يبدو عليها الإنزعاج لما تراه
سارة :

رمزى؟؟ شفتني في الرقصة؟

حبيبي؟

ينظر رمزى لمفاتيح سيارة على المنضدة وعلبة سجائر وكيريت وينظر فيجد كأسين على المنضدة ينظر ناحيتها بتعجب .. داني يعوود يقترب حتى يتوقف بجوار سارة التي ترتبك أكثر وهي تضبط شعرها بحركة لا إرادية من التوتر

رمزى :

مين ده؟؟

سارة تبتلع ريقها ، وهي تنظر حواليتها وتتحدث بلكنة أجنبية

داني بهدوء شديد يقترب من رمزي: بنسوار

داني :

مين ده يا سارة .. صديق؟

تبتلع ريقها ولا ترد , ينظر رمزى لها ولداني وهو بيتسم متهمكا وكأنه فهم الأمر

رمزى :

مين ده؟ ردى على

سارة :

فى إيه رمزى عاوز إيه؟؟

رمزى :

عاوز أعرف مين ده؟

سارة :

من فضلك رمزى وطى صوتك أنا مش عاوزة فضايح فى المكان

رمزى يقوم ويجذبها من يدها وهي تحاول مقاومته

جون :

هاى .. سيبها يا شخص أنت؟

رمزى :

كلامى مش معاك أنت دلوقتى .. قومى.. لازم نتكلم لوحدينا

داني :

لا لا موش كده مون آمي

ما يصحش تمسك البنبت الرقيقة كده

رمزى يصر ويجذبها من يدها وهو لا يرد على داني ، يتدخل أحد أصدقاء داني ويدفع رمزي

في صدره ليعده

يختل توازن رمزي

الشاب يلکم رمزى فى وجهه وهو يدفع سارة بعيدا عنه يلتفت الجميع ، يحاول رمزى لکم الشاب مجموعة شباب يلتفون حول رمزى ويمنعونه ، يلکمه الشاب صديق سارة فى وجهه

يترنح رمزي

يمسكه شابان بينما يحاول الشاب لکمه مرة أخرى

تقف فجأة

عصا معترضة لکمة الشاب ومنقذة رمزى ، الشاب يده تتألم من إعتراض العصا التى أرتطمت بيده

الجميع يلتفتون نحو صاحب العصا

العزاوى "فى ستيناته ، وسيم ممثلى بعض الشئ يبدو عليه الهيبة ، يرتدى بدلة أنيقة ، وحذاء لميع ، وفى يده خاتم ذهبى ذو فص أسود ضخم ، ينطق أحيانا بالفرنسية وأحيانا بالإنجليزية ، يحدق فى عين من يكلمه "

العزاوى :

نو نو .. لاء ده مش عدل .. کلکو على واحد ما يصحش

يقرب العصا من أنف الشاب وهو يحدق فى عينه وكأنه يهدده

الجميع مبهورين من الظهور والشجاعة الفجائية للعزاوي

الذي يلتفت نحو داني

العزاوى :

سيبها تخرج معاه يقولها كلمتين وترجع تانى ،

يلتفت نحوه داني بتساؤل

العزاوي : ماتقلش سيبهم يصفوا اللي بينهم ها ترجعلك تاني

لو ليك نصيب فيها

استبيننا؟

لوليتا الحلقة الأولى محمد حسان

يلتفت لرساة وهو يبتسم لها بود مفاجئ بعد تلك النظرة القوية للشباب ، فتهز رأسها بالموافقة وكأنها تنفذ أمره
ينظر للشباب الأجانب الذين يحيطون برمزي ،

العزوى :

وحضراتكم مافيش داعى لكل ده الموضوع بسيط.. أتفضلوا أعددوا وأستمعوا بالمزيكا الجميلة ، ستيفانى..
" لا في ان روز " سلفو بليه

ينظرون فى إتجاهه وهم يجلسوا فى مكانهم ، العزوى ينظر لرمزي

:

ينظر له رمزي فى عينه والعزوى يبتسم له مطمئنا له ورمزي يسحبها من المكان للخارج وعلى شفته خيط
من دم يمسه وهو يجذبها من يدها خلفه

يجلس العزوى مع مجموعته وهم ثلاث رجال أجنب ، بينما يعزف الفرقة على البيانو

لا في ان روز

قطع

شرفة اتينوس

رمزي وسارة يقفان متواجهان

تتودد له سارة

سارة : معقولة رمزي الخجول اللي بيمسك ايدي بالعافية يطلع جواه الوحش ده؟

انت طلعت مصارع كبير

يلتفت لها بسخرية: ومعقولة البننت الصغيرة الهادية تطلع كل المجون وال ...

تقاطععه ساره: دي حياة يا رمزي

حياتي اللي مش عارفة أعيشها

رمزي: مين اللي كان معاكي ده ياسارة

سارة: قبل ما اجاوب نتفق في الأول : اننا قبل ما نكون بنحب بعض

اننا أصحاب

صح؟

رمزي خانعا: صح

سارة: وانت اللي ياما حميتني من أمي وحاولت تساعدني في المدرسة

رمزي: يعني مربيكي وعارفك وفاقس كل حركاتك

سارة مبتسمة: يبقى هتصدقني لما هقولك ان داني ده مافيش بيني وبينه أي حاجة غي انه

علاقة شغل وبس

رمزي مندهشاً: شغل ايه؟ هنشغلي رقاصة؟

سارة : وماله الرقص مش عيب

بس انا باشتغل موديل

بيرسمني الرسمة بجنيه

رمزي أنا مش موافق

سارة: او كي لو مش موافق

ممكن تديني انت الجنية أول كل أسبوع؟

مش هقولك اخطبني دلوقتي

لكن عاوز تمنعني من الشغل
وفر لي الفلوس اللي بتيجي منه

ولا ايه رأيك؟

رمزي ينظر لها حائرا

ولا ينطق

قطع

القاعة

مائدة العزاوي

الرجل الصعيدي والحضور ملتفتين نحو العزاوي الذي يصب بنفسه النبيذ لهم
يلتفت له الخواجة

أليكس :

أنت بتأخذ كميات السلاح دي كلها لمين عزاوي بيك؟؟

العزاوي :

ولو أنه ما يخصكش بس ها أقولك .. للمصريين لآهل بلدي, يأمنوا نفسيهم من المطاريد
اللى فى الجبل ومرابطين فوقه .. علشان يحموا بيوتهم ومواشيهم وأرضهم وعرضهم

أليكس :

والمطاريد بيحبوا سلاحهم من مين؟؟؟

العزاوي :

منى أنا برضه

رجل 2 :

منك أنت؟؟ طيب ليه بتديهم السلاح؟؟

العزاوي يصب كأس آخر من زجاجة أمامهم حتى يمتلئ الكأس على آخره ويفيض ويقع
على المنضدة ، وعيونهم جميعا متعلقة بما يفعله

العزاوي :

عشان يأمنوا نفسيهم من الحكومة .. الظالمة .. المفترية اللى طلعتهم الجبل .. فيحموا
نفسهم ومالهم وعرضهم ..

أليكس :

أنت راجل خطير عزاوي .. وليك علاقات متشابكة كثير أنا مش فاهمها

العزاوى :

مش ضرورى يا خواجه تفهمها.. المهم أن مافيش ولا حته سلاح تدخل الصعيد إلا عن طريقى أنا ،علشان أقدر أوقف "القدر" لما يجى ،

والحكاية ماتبقاش بظرمييط وسلاح فى يد الجميع ،اللى عايز ياخذ وخلص ،لازم يكون فى كبير متحكم فيه ..

أنا عارف مين محتاج إيه بالقدر وبالستتوفة وعارف مين أديه ومين أمنع عنه ..
يمد يده بالشوكة وبأخذ من طبق الجمبرى أمامه وبأخذ واحدة كبيرة يضعها فى طبقه

العزاوى :

ومافيش لعب معايا يا خواجه لآنى بأعرف دبة النملة وهى داخله من أول اسكندرية
للسلوم او الفيوم.. لحد أم درمان فى السودان .. فاهمنى أنا بأقول إيه

ينظر فى عيونهم ، يتلع الرجل الثالث الصامت ريقه والعزاوى يعطيه الكأس الممتلئ حتى نهايتها

العزاوى :

أشرب يا بول .. أشرب

ينظر الرجلان ناحية بول وهما يراقبانه ،يشرب وهو بيدو عليه الخوف من العزاوى الذى يدقق فى عيونه وهو يشرب ، يضحك الرجلان ويضحك معهم العزاوى ويضحك الرجل الثالث هو الآخر ، والعزاوى يصب له ويملاء كأسه

العزاوى :

أشرب يا بول كمان أشرب

يلمح العزاوي داني والشباب متحمسون وبتهامسون

يستند العزاوي على عصا

العزاوي

دقيقة وراجع

قطع

الشرفة

سارة في حضن رمزي

سارة : انا موافقة أصبر كام شهر
رمزي وانا هموت نفسي شغل

يدخل عليهما العزاوي

العزاوي:

الحياب اتصالحوا؟

ياللا خدها من الباب الوراني وصلها بيتها وانا هاشغل العيال اللي جوه

سارة مبتسمة:

لأ أنا ليه حاجات على الترايبوة شنتتي و,,

العزاوي:

طب اتفضلي

يبقي انا والأفندي اللي تخرج م الباب الوراني

يضحك العزاوي بقوة

بينما تغادرهم سارة نحو مائدة داني

قطع

الكورنيش

العزاوي يضع يده على كتف رمزي ويسيران بموازة الكورنيش

العزاوي:

صدقني ، اللي بيعك ساهل إياك تشتريه

حتى ولو ببلاش

النوعية دي بلاعة فلوس

رمزي : بس انا..

يقاطعه العزاوي بصحكة مجلجلة

بتحبها

هاه

بتحبها

يزداد هستيرية في الضحك

العزاوي :

انت اسكندراني؟

رمزي: أبا عن جد

العزاوي عمرك سهرت على بحيرة مربوط

رمزي: أبدأ

يشير العزاوي لأحد الحناطير

العزاوي: فاضي يا اسطى؟

يقف سائق الحنطور بينما يقفز العزاوي داخله

ويلحقه رمزي

قطع

خص تعيمة

عشة متوسطة الحجم

بها عازف قانون وعازف رق وعازف كمان

وعدد قليل جدا من الرجال بينهم الشبوكشي

جالسون امام موائد خشبية حقيرة يشربون النبيذ او يدخنون الشيشة

وبينهم تعيمة الخمسينية

تغني

نعيمة

انا اسمي مارية

ووحداية

من اسكندرية

يدخل العزاوي ويجواره رمزي

تلحظه نعيمة فتتوقف عن الغناء

يكمل العزاوي الغناء

العزاوي ومن اسكندرية

تقترب منه نعيمة: لك وحشة يا عزاوي باشا

يحاول الشبوكشي التواري

يخبطه العزاوي بعصاه فيلتفت نحوه بين الخوف وشبح ابتسامة على وجهه

نهاية الحلقة الاولى

لوليتا الحلقة الأولى محمد حسان